

Carta Cha Xihna Ri Sacuhun Ra Apóstol Pablo Chi Ra Timoteo

Nu tyaa ra Pablo noo
tutu chi ra Timoteo

1 Yuhu ra Pablo cuví noo apóstol chi ra Jesucristo vatyí tachí ra chii na caque tyiño ra. Maa Nyoo cuví ra sacacú chi yo. Ta ican ra catyí tyi sacuvi tyiño ihya, ta Sutu Mañi yo Jesucristo ñandíhi. Vatyí maa ra cuví ra cha yihí iñi yo. ²Tyaí tutu ihya chi yoho Timoteo vatyí sehe vahi cuví chuun cha cuenda cha chinó iñun tuhun ra Cristo cha sacote chuun. Ta cuñí vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahvi ra chuun. Ta na coo ca cha taxi ri añimon saha ra.

Nu sañaha ra Pablo chi yo yoso caa saha yo cuenda tuhun cha ña ndicha

³Quivi quite ñuu Éfeso chiña cha cuaquichi ityi Macedonia ihya, catyí chuun na ndoun Éfeso chiña ta catyun chi suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuvi con tari cuhva catyí chuun quivi cuan. ⁴Çatyun chi ñu cuan vatyí ma tyaa ñu xiñi ñu tuhun tyisu, ni tuhun cha cuví chi noo noo sutu

chahnu ñu. Vatyí cha nuu cha tyinyeé chi chi yo, satondó chi xiñi yo. Maa maa ri cha ñima ri tuhun cuví yuhu yo. Ña tyinyeé chi chi yo cha chinó iñi yo cha sacuví ca yo cha catyí Nyoo.

⁵Soco tuhun cha catyí maa yo chi ñáyivi, cha cuñi yo chi tahan yo chihin cha cacú añima yo cha sanduvaha Nyoo. Cuñi yo chi ñu chihin cha vaha chicá xiñi yo ta chihin cha ndicha chinó iñi yo chi Nyoo. ⁶Soco yihí ñu saña ñu tuhun ihya ta quita caxiin ñu chihin tuhun cha ñima ri tuhun. ⁷Cuñí ñu cuví ñu ñu sacuahá cuenda ley chahnu Nyoo soco ni maa ñu ta ña cutuñí iñi ñu tuhun cahán ñu.

⁸Chitó yo tyi ley cuan, vaha chi, soco çotyíño yo tari cuhva tahán chi. ⁹Cuñí chi coto yo vatyí ni noo ley ña chicunyaá chi cha cuenda ñu vaha. Soco nyaá chi cha cuenda ñu nacahnú nu cahán Nyoo, ñu iyó cuatyí, ñu quiñi iyó, ñu ña saha ñáyivi chi Nyoo. Nyaá tucu chi cha cuenda ñu chahñí chi sutu, chi sihi, ta cha cuenda tandíhi ñu chahñí. ¹⁰Nyaá ley cuan cha cuenda ñu iyó chihin rayí o ñusihí ta ñima yíi ña o ñasihí ra cuví. Nyaá chi

cha cuenda ra ca iyó chihin tahan yíi, ta cha cuenda ñu suhu cha chii ñáyivi, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta suri nyaá tucu ley cuan cha cuenda yóó ñu cha ña nyicon cuhva cahan tuhún Nyoo. ¹¹Ta tuhun tyaqui xaan cha sacoto Nyoo chi yo cha cuenda ra Cristo, ican cuví tuhun cha nacuhva cuenda Nyoo chii vatyí sacote chi ñáyivi. Maa ra cuví ra cha sacahnú yo.

Chahá ra Pablo tyahvi nyoo chi Nyoo vatyí nyehé ndahvi ra chi ra

¹²Nacuhvé tyahvi nyoo chi Sutú Mañi yo Jesucristo cha cuenda tunyee iñi cha chaha ra chii ta nyehe ra chi tari noo ra chinó vaha iñi, ta natyaa tyiño ra chii vatyí sacuví tyiño nuu ra. ¹³Tyehe caa sacuvi ra chihin vasi ta ityí chata ca yuhu cahán ña vahi siqui ra. Chicá nyiquen chi ra ta cahán cuehi chi ra. Soco Nyoo cundahví cuñi ra nyehe ra chii, vatyí yuhu ta chino ca iñi chi ra, ta ña chite cha chinyacuví. ¹⁴Ta tyinyee xaan Sutú Mañi yo chii. Ta chahá ra cha chino xaan iñi yo chi ra, ta cha cuñi xaan yo chi ñáyivi vatyí iin ri cuví yo chihin ra.

¹⁵Ta ndicha, cha ndicha vaha cuví tuhun ihya. Ta tahán chi cha chino iñi yo, vatyí ra Cristo Jesús quichí ra siqui ñuhu ñayiví ihya vatyí sacacú ra chi ñu iyó cuatyí. Ta yuhu cuví noo ra quiñi caa ca cha nuu tandihi ñu cuan. ¹⁶Yucuan chaha xihna que tavá Nyoo chii nu quiñi caa vatyí tacuhva sañaha ra Jesucristo chí ñáyivi tyi cuñi xaan

ra chi ñu. Tacuhva vatyí nachino iñi ñu ta cucoo ñu noo ñayiví chaa cha ma naa ca maa. ¹⁷Yucuan chaha na sacahnu yo chi ra cha tyicuan ri nyacá ñaha, ra cha ñahri tuhun chihi iyó chi, ra cha ña cuví nyehe yo chi, ra cha noo ri maa ra cuví Nyoo ta chitó ra tandihi cha chiñi tuñi. Na sacahnu yo chi ra ta na cunyaca ñaha ra tyicuan ri maa. Ta na cuvi chi tyicuan caa.

¹⁸Ihya tuhun chahí chuun, yoho Timoteo sehi, vatyí cañi tahan vahun chihin tatyí ña vaha chihin cha chinó iñun, ta chihin cha vaha cuñi añimon tyi chitón tyi vaha sacuvun noo cha sacuvún vatyí suri tuhun ihya cachahá ra hermano chuun chihin ndusu Nyoo. ¹⁹Ta ma sandihun cha chinó iñun chi Nyoo ta sacuvun cha vaha na vaha cuñi añimon. Vatyí sava ra sandihi ra tuhun ihya, yucuan chaha caquita xiin ra. ²⁰Tyicuan caa sacuví tucu ra Himeneo ta ra Alejandro. Ta yucuan chaha nacuhva cuende chi ra chi cuihna, na cacutuhva ra yoso caa tahán chi sacuvi ra ta ma cahan ña vaha ca ra chi Nyoo.

Nu sañahá ra Pablo yoso caa cacán tahvi yo

2 Catyí chi ndo vatyí cha nuu tandihi ca, tahán chi cha cacán tahvi ndo chi Nyoo cha cuenda tandihi ñáyivi. Ta nacuhva ndo tyahvi nyoo chi Nyoo cha cuenda ñu. ²Cacán tahvi ndo cha cuenda ra cacuvi rey ta cha cuenda tandihi ra cacuví tyiño. Cacán tahvi ndo cha cuenda ra tacuhva cuvi coo vaha yo, coo taxi yo, coo yo noo ñayiví cachi nuu Nyoo ta

nuu ñáyivi. Ta cusaha ñu ñáyivi chi yo. ³Vatyí ihya cuví cuhva tahán iñi Nyoo ra cha sacacú chi yo. ⁴Ta maa ra cuñí ra vatyí cacu tandihí ñáyivi. Ta cuñí ra cha nacoto ñu cha ndicha. ⁵Vatyí iyó noo ri Nyoo. Ta iyó noo ri ra cuví chaa nuu Nyoo tyiño nuu yo. Ican ra cuví ra Cristo Jesús. Ta cuví ra ñáyivi tari maa yo. ⁶Ta maa ra Jesucristo chahá ra ñáyivi ra tyiño nuu tandihí ñáyivi. Tiyahvi ra cuatyí yo tacuhva cuvi cacu tandihí yo. Ta chinó cava cuan quívi tyaá maa Nyoo cuhva. ⁷Cha cuenda ihya, tyatyíño Nyoo chii, vatyí cahin tuhun ra, ta cuvi apóstol ra, tachí ra chii vatyí sañahi chi ñu cha ñima ñu Israel cuví, yoso caa nachino iñi ñu cha ndicha. Ta nyoho chitó ndo tyi ña tuhvé cahín cuendu vatyí cuenda ra Cristo yihí.

⁸Yucuan chaha cuñí vatyí çacan tahvi rayí tandihí ri ityi. Ta na coo ra noo ñáyivi ndii. Ta na sacahnu ra chi Nyoo chihin cha nacoñehe ra ndaha ra nuu Nyoo. Ta vaha çaca xiñi ra. Ta ma coo ra tisihi chihin ñáyivi. Ta ni ma xaan ra. ⁹Tyicuan caa tucu ñusihi. Cachi cuhva cujhno ñu, tari cuhva tahán chi cujhno ñu yihí cuenda Nyoo. Ta ma iyo xaan cujhno ñu. Ma iyo xaan sanduvii ñu xiñi ñu. Ñima chihin xuhun cuaan o yuu tyaquí, o chihin sahma yahvi xaan sanduvii ñu chi ñu. ¹⁰Soco chihin cha cachi coo ñu ta chihin cha sacuvi ñu cha vaha na sanduvii ñu chi ñu, tari tahán chi sacuvi ñu nacuhvā cuenda chi chi Nyoo. ¹¹Ta taxi ri cunyaa ñusihi ta tyasoho ñu tuhun Nyoo. Ta saha ñu ñáyivi chi ra chahá tuhun chi ñu.

¹²Vatyí ña chahí cha sañaha ñusihi. Ni ña chahí cha cunyaca ñaha ñu chi rayí. Soco taxi ri na cunyaa ñu. ¹³Vatyí xihna ca chi ra Adán savaha Nyoo ta yahā cuan ta chi cu Eva. ¹⁴Ta ñima chi maa ra Adán sandavi ñaha ra ña vaha, soco chi ñasihi ra cuvi sandavi ñaha ra ta chicoo cuatyí ña. ¹⁵Soco ñusihi cucacu aña ñu cha cuenda cha sacacú ñu sehe ñu, ta sacuahnú vaha ñu chi chi. Soco tatu chinó vaha iñi ñu chi Nyoo ta cuñí ñu chi ra ta chi ñáyivi, ta cachi coo ñu nuu Nyoo ta nuu ñáyivi ñandihí.

Yoso caa tahán chi coo ra yihí ndaha chi ñu yihí cuenda ra Cristo

3 Ndicha tuhun ihya: Tatu minoo ndo cuñí ndo quindaha ndo chi ñáyivi yihí cuenda ra Cristo, vaha xaan tyiño quichí cuvi iñi ndo sacuvi ndo. ²Soco niñi cuñí chi vatyí ra yihí ndaha vehe ñuhu cuvi ra noo ra ñahri cuatyí iyó. Ta cuñí chi cha coo noo ri ñasihi ra. Ta cuñí chi cha cuvi ra noo ra tyihi tuñi vaha iñi yoso caa cunyacuvi, noo ra vaha nuu ñáyivi. Ta cuñí chi vatyí vaha cuví ra chihin ñáyivi chaa vehe ra. Ta coto ra yoso caa sañahá ra. ³Ma cuvi ra noo ra tuhvá chihí ndixi, ni ma cuvi ra noo ra nanducú tisihi. Ta ma cuvi ra noo ra nducu xuhun noo cuhva ña vaha. Soco cuñí chi cha vaha ñáyivi cuví ra, ta cuvi ra noo ra ña tuhvá cañi tahan. Ta ma cuvi ra noo ra cuñí xaan xuhun. ⁴Ta cuvi ra noo ra yihí ndaha vaha ñasihi ta sehe: Noo ra nyacá ñaha chi sehe tacuhva vatyí quichaha ñu chi ra, ta saha ñu ñáyivi chi ra. ⁵Vatyí tatu ña chitó ra cunyaca ñaha ra vehe ra, çyoso caa cusaha cumi ra

vehe ñuhu Nyoo? ⁶Ta noo ra nichaa chihin tuhun Nyoo ña tahán chi quindaha ra vehe ñuhu vatyí coto sacahnu ra chi ra ta tachi tuñi Nyoo chi ra, tari tachí tuñi ra chi cuihna vatyí cahnu sahá ra chi ra. ⁷Ta siin ri cuñí chi vatyí cuví ra noo ñáyivi vaha nuu ñu ityi chata, coto tahan ra ticahan nuu ta cana cava ra chichi ndaha cuihna.

Yoso caa tahán chi coo noo ra tyinyee chihin tyiño vehe ñuhu

⁸Ta tyicuan caa tucu ra tyinyeé chihin tyiño vehe ñuhu. Na cachi coo ra. Ma cuvi ra noo ra cuendu, ta ma cuvi ra noo ra tuhva chihi ndixi ñandihí. Ta ni ma nyiyo iñi ra saha canaa ra xuhun chihin noo cuhva ña vaha. ⁹Cuñí chi vatyí cutuñí vaha iñi ra yoso caa tahán chi chino iñi yo chi Nyoo ta coto vaha ra tyi vaha cuahan ra chihin Nyoo. ¹⁰Ta cuñí tucu chi cha nyehe xihna yo tatu vaha iyó ra chihin Nyoo tyicuan ta cuví sacuvi ra tyiño vehe ñuhu. ¹¹Ta tyicuan caa tucu ñusihi, cuñí chi vatyí cuví ñu ñáyivi vaha. Ma ñii ñu cuendu. Ta cachi coo ñu. Ta niñi cuñí ñu chihin tandihí ri tyiño. ¹²Noo ra tyinyeé chihin tyiño vehe ñuhu na coo noo ri ñasihi ra. Ta cuñí chi vatyí coto vaha ra cunyaca ñaha ra chi sehe ra ta ñáyivi nyicú vehe ra. ¹³Vatyí ra tyinyeé, tatu vaha sacuvi ra tyiño cha tahán chi sacuvi ra, cuahan ca ra ityi nuu chihin Nyoo. Ta cuní ca iñi ra cahan ra tuhun cha chinó iñi ra chi ra Cristo.

Noo tuhun xehe cuenda cuhva chino iñi yo

¹⁴⁻¹⁵Yihí iñi cha cuhin cha numi ri cunyehi nu nyaún. Soco tatu cucuei,

yucuan chaha tyai ihya chuun tacuhva coton yoso caa tahán chi coo ñáyivi cuenda Nyoo. Vatyí maa yo cuví yo vehe ñuhu Nyoo nyitó. Ta cuñí chi vatyí sañihi ca yo sañaha yo cha ndicha cha cumí yo chi inga ñáyivi. ¹⁶Cha ndicha cuví vatyí yaha xaan cuhva cahnu tuhun xehe cha sanatuví Nyoo, vatyí coo yo tari iyó maa ra:

Nyoo nanduví ra rayii ta chicoo ra chichi noo coño ñuhu tari maa yo.

Ta catyí Tatyí li vatyí vaha ra. Ta nyehe ángel chi ra.

Nicahnu ñuhu ñayiví cahán ñu tuhun ra.

Ta chinó iñi ñáyivi chi ra nicacahnu ñuhu ñayiví.

Ta cuanuhú ra nya gloria.

Nu catyí ra Pablo vatyí yihí ñu ma chino ca iñi ñu nu cuahan chi tyembu

4 Soco cahán cachi Tatyí li ta catyí chi vatyí nu cuandihí tyembu yihí ñu ma chino ca iñi ñu chi ra Cristo vatyí cutyasoho ñu tuhun cahán tatyí ña vaha cha sandavi ñaha chi ñu. Ta cunyicon ñu ndusu ñuhu cuihna. ²Cutyasoho ñu tuhun cahán ñu cuendu. Ta ñu cuendu cuan ña tuví ca iñi ñu cuhva nyacuví ñu vatyí cha ndundava xaan añima ñu. Tari cha cayú añima ñu chihin noo caa ihñi ta ndundava chi cuví cuan. ³Cucasi ñu cuan nu tandaha ñáyivi. Ta cucatyí ñu vatyí ña vaha cha cachi yo suhva nuu nyayu. Vasi chitó yo tyi tandihí nuu cha cachi yo, Nyoo savaha. Ta tandihí yo cha chinó iñi yo chi Nyoo ta chitó yo cha ndicha,

cuvi cachi yo ta nacuhva yo tyahvi nyoo chi ra. ⁴Vatyí tandíhi cha savaha Nyoo ta vaha. Ta ña tahán chi catyi yo tyi ña vaha. Cuví cachi yo tatu nacuhva yo tyahvi nyoo chi Nyoo. ⁵Vatyí ndundií chi cha cuenda tuhun Nyoo ta cha cuenda cha chicán tahvi yo chi Nyoo.

**Yoso caa noo ra vaha sacuví
tyiño nuu ra Jesucristo**

⁶Tatu sañahun tuhun ihya chi tandíhi yañi yo, cua cuvun noo ra vaha cahán tuhun ra Cristo Jesús. Ta tuhun cha chinó iñi yo ta tandíhi tuhun ra Cristo cha nyicón, cua tyinyee chi chuun. ⁷Soco ma quichahun tuhun cuendu, tuhun tondo cha iyó ñáyivi ihya. Vaha ca saniñun chuun sacuvun maa maa ri cuhva cuñí Nyoo. ⁸Cha saniñí yo ndunye coño ñuhu yo tyinyeé chi suhva chi yo. Soco cha saniñí yo sacuví yo cuhva cuñí Nyoo, tyinyeé chi chi yo tandíhi ri cuhva, vatyí tyinyeé chi chi yo ñáyivi ihya. Ta tyinyeé tucu chi chi yo cha coo vaha yo nu cuchaa yo andívi. ⁹Ta ndicha, cha ndicha vaha cuví tuhun ihya ta tandíhi yo tahán chi cha chinó iñi yo. ¹⁰Ta suri cha cuenda ihya sahá tyiño yo ta nyehé yo tindocho vatyí nyatú yo naquehen yo cha vaha cha chaha Nyoo nyito chi yo. Vatyí maa ra cuvi ra sacacú chi tandíhi ñáyivi, ta xihna ca chi yoó cha chinó iñi yo chi ra.

¹¹Ihya tuhun cua sañahun chi ñáyivi, ta cusaniñun chi ñu na cutuhva ñu. ¹²Cachi sañahun chuun coto ma saha ñu ñáyivi chuun cha cuenda cha cuvún noo ra tyivaa. Soco sañahun noo cuhva vaha chi

ñu chihin cuhva iyón, chihin cuhva cahun. Sañahun chi ñu, chihin cuhva cha cuñún chi Nyoo ta chi ñáyivi, chihin cuhva chicá xiñun, chihin cuhva chinó iñun, ta chihin cuhva sacuvún maa maa ri cha vaha. ¹³Cha ni ri ca cha cumañi chai nu nyicú ndo, sacuaha con tuhun Nyoo nuu ñu yihí cuenda Nyoo. Cuhva tuhun chi ñu ta sañahun chi ñu yoso caa caca vaha ñu ityi Nyoo. ¹⁴Sahun cuenda nyatu cha chaha Nyoo chuun quivi cha tyiso ra yindaha vehe ñuhu ndaha ra sicun ta cahán ra yoso cuhva chahá Tatyí Ii Nyoo chi ra. ¹⁵Tyaa vaha xiñun tuhun ihya ta sacuvun. Tacuhva vatyí nyehe ñáyivi yoso caa cuahun ityi nuu ca chihin Nyoo. ¹⁶Saha cuenda chuun chihin cuhva iyón. Ta saha cuenda cuhva sañahun chi ñáyivi ta ñaha saña ndahun cha vaha. Tatu tyicuan caa sacuvún cuacacun, ta cucacu ñu chiñí tuhun sañahun ñandíhi.

**Nu chahá ra Pablo tuhun chi ra
Timoteo yoso caa cuhva ra tuhun
chi ñu yihí cuenda ra Cristo**

5 Ma cahun chi noo ra chahnu, soco cuhva tuhun chi ra tari cha sutun cuví chi ra. Ta chi ra tyivaa cuhva tuhun chi ra tari cha yañun cuví chi ra. ²Ta chi ñu chahnu tari cha sihun cuví chi ñu. Ta chi ñu tyivaa, tari cha cuhvon cuví chi ñu. Ta sacuvun chihin cha vaha chicá xiñun.

³Tyinyee chi ñu ndahvi ñu chihí yii tatu yori ñáyivi chi ñu cha tyinyee chi ñu. ⁴Soco tatu iyó noo ñaha chihí yii ta iyó sehe ña, o sehe ñañi ña, cuñí chi cha cutuhva

xihna maa ñu cha tyinyee ñu chi ña. Na nicohon iñi ñu yoso caa saha cuenda sihi ñu chi ñu ta luhlu ñu. Ta tyicuan caa tahán chi cha saha cuenda tucu ñu chi ña vityin. Vatyí cha tyehe caa vaha xaan, ta cha tahán iñi Nyoo cuví. ⁵Soco ñu chihí yíi cha ndoo noo tuhun ri maa, chi Nyoo tyihí ñu iñi ñu ta tyicuan ri chicán tahvi ñu chi ra ñicahñu ta cha cuaa. ⁶Soco noo ñaha chihí yíi cha nducú tusii iñi cha iyó ñáyivi ihya, tari quívi cha chihí ña cha cuenda tuhun Nyoo cuví cuan, vasi iyó ña. ⁷Sacoto tuhun ihya chi tahan yo tacuhva cha ma ñihi ñáyivi cuhva cahan ñu chi ñu. ⁸Soco tatu yihí yo cha iyó ñáyivi chi yo cha chihí yíi ta ña chicá xiñi yo cha cuenda ñu, ta cha xihna ri cha cuenda ñu vehe yo, tari quívi cha ña chinó iñi yo chi Nyoo cuvi cuan. Ta cahnu ca cuatyí yo ta ñima ca ñu cha ña chinó iñi chi Nyoo.

⁹Nu tutu cha nyaá sivi ñu chihí yíi, na cunyaa sivi ñu, soco ñu cha yahá ca uñi xico cuiya. Ta cuví cunyaa sivi ñu tatu noo ri yíi ñu chiyo. ¹⁰Ta cuñí chi tatu ñohó nuu vaha ñáyivi chi ñu cha cuenda cha vaha cha sacuví ñu: tatu sacuahñu vaha ñu sehe ñu, tatu chahá ñu cha cachi ñu chaá vehe ñu, tatu sacuví ñu tyiño nuu yañi yo chihin cha tandíhi añima ñu chihin cha ndahvi sahá ñu chi ñu, tatu tyinyee ñu chi ñu nyehé tindoho, tatu tyehe caa sacuví ñu tandíhi nuu cha vaha, cuví cunyaa sivi ñu.

¹¹Soco ma tyihí ndo sivi ñu cha ta chaa ca uñi xico cuiya coto coo quívi ta quichi cuvi iñi ñu tandaha

ñu inga chaha ta sandíhi ñu tuhun sacuví ñu tyiño nuu ra Cristo. ¹²Ta tyicuan caa cucoo cuatyí ñu vatyí ña sacuví ca ñu cuhva catyí ñu. ¹³Ta siin ri tatu chicá noo suchan ri maa ñu tahan tahan vehe ñáyivi. Ta ñima yucuan ri soco chicá noo ndíhi ñu chihin cuendu ñu. Ta tyihí ñu chi ñu noo nu ñahri cuenda ñu. Ta cahán ñu cha ña tahán chi. ¹⁴Yucuan chaha vaha taxin ca na tandaha ñu inga chaha. Na coo sehe ñu. Na saha cuenda ñu vehe ñu. Ta ma cuhva ñu ityí chi ñu xaan iñi chi yo vatyí cahan nyaa ñu chi yo. ¹⁵Tyehe caa catyí chuun vatyí yihí ñu cha sañá ñu chi Nyoo ta na nyicon ñu chi ra ña vaha. ¹⁶Tatu noo ñu yihí cuenda Nyoo ta iyó noo ñáyivi chi ñu cha chihí yíi, cuñí chi cha tyinyee ñu chi ñu, tacuhva cha ma cuvi ñu noo carga chi vehe ñuhu. Ta tyicuan caa ta cuví tyinyee ñu vehe ñuhu chi ñu chihí yíi cha ndicha ndicha chiñuhú chi.

¹⁷Ra chahnu ra nyisó tyiño vehe ñuhu, cuñí chi vatyí saha xaan ñu ñáyivi chi ra. Ta cha xihna ca chi ra cahán tuhun Nyoo ta ra sañahá chi ñu. ¹⁸Vatyí tuhun Nyoo catyí chi: “Ma tyihun yoho yuhu sindiqui nu saha tyiño ti tacuhva vatyí cuvi cachi ti chiin.” Ta catyí tucu chi: “Iyó ityí chi ra cha sahá tyiño cha ñihí ra yahvi ra.”

¹⁹Tatu tyaá ñu cuatyí siqui noo ra chahnu ra nyisó tyiño vehe ñuhu, ta tatu ña quita uvi o uñi tahan cha ndaa, ma quichahun chi ñu tyaá cuatyí cuan. ²⁰Soco ñu sañihí ca sacuví cuatyí cuñí chi cha catyí ndo chi ñu chihin nuu tandíhi ñu nyicú vehe ñuhu tacuhva vatyí tandíhi ca

ñu na cuyuhvi ñu sacuvi ñu cha ña vaha. ²¹Tyatyiñe chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachi ra. Ta catyí chuun vatyí quichahun cha catyí ihya ta ma cahun tumañi iñi chi noo ra ta ni chi inga ra. ²²Ma numi xaan ri tyaa tyiño chi noo ra cha cuvi ra tyiño vehe ñuhu. Coto ndoo cuatyí sacuví ra sicun. Saha vahun cuenda chuun chihin tandihi cha sacuvún ta ma cuhvon ityi chi cha ña vaha.

²³Ta vatyí iyó noo cuehe chichun, ma cohun maa ri maa ndutya, soco cohun chiin vinu ñandihí.

²⁴Yihí ñáyivi quetuví ri cuatyí ñu cha cumañi ca cutuñi chi ñu. Ta yihí ñu nya cha yaha cutuñi chi ñu ta cuquetuvi cuatyí ñu. ²⁵Ta tyicuan caa tucu cha vaha cha sacuví yo, ña xehe caá. Soco vasi ña tuví cha numi ri, ñima tyicuan ri cucohon xehe chi.

6 Ñu cha cuvi musu cuñí chi cha saha vaha ñu ñáyivi chi chitoho ñu. Tyicuan ta ma ñihi ñáyivi cuhva cahan ña vaha ñu siquí Nyoo ni siquí tuhun ra, cha sañahá yo. ²Ta tatu noo musu iyó chitoho ra cha yihí cuenda Nyoo, ña tahán chi cha ma saha ra ñáyivi chi ra vatyí yañi ra cuenda Nyoo cuví chi ra. Soco ñihi ca cuñí chi cha sacuví ra tyiño nuu ra, vatyí chinó tucu iñi maa ra chi ra Cristo, ta Nyoo cuñí ra chi ra. Sañaha tuhun ihya chi ñu hermano ta cuhva tuhun chi ñu na sacuvi ñu.

Cuhva iyó yo ta cusii cuñi yo

³Tatu iyó noo ra cha sañahá inga tuhun cha ña chachí tahan chi chihin

tuhun vaha cha sañahá Sutu Mañi yo Jesucristo, ta ni ri chihin tuhun vaha cha cuahan sacuaha yo, ⁴cuví ra noo ra cahnu sahá chi. Ta tahán xaan iñi ra cuvi yuhu ra siquí noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihi ta tuhun nyiyo iñi, tuhun cha cahán ña vaha chi tahan, ta tuhun cha ña vaha cuñí nyehe chi tahan. ⁵Ta tyicuan ri cañi tahan ñu vatyí quiñi chica xiñi ñu, vatyí ña chitó ñu cha ndicha. Nyacua cuñí maa ñu tyi cusaha ganaa ñu xuhun chihin tuhun Nyoo. Ma cutahan ndo chihin ñu cuan. ⁶Ndicha vatyí cha sacuví yo cuhva catyí Nyoo ta ndoo yo vaha chihin cha cha chaha ra chi yo cuví chi tari noo cha tyayii iyó chi yo. ⁷Vatyí ñahri nyiso yo vachi yo ihya ñáyivi. Ta ñahri cuiso yo cunuhu yo quívi cúvi yo. ⁸Soco tatu iyó cha cachi yo ta sahama ñihno yo, na cusii iñi yo, ta na ndoo yo vaha chihin yucuan ri. ⁹Soco ñu cuñí cutyayii, nducú nyehe ra ña vaha chi ñu. Caná cava ñu chichi xayu ra. Cutondó xiñi ñu chihin cha cuaha xaan cha quichi cuví iñi ñu. Ta sativí chi chi ñu ta nu ndihí tuhun cutivi ndihí ñu ta cunaa ñu. ¹⁰Vatyí cha cuñí xaan yo xuhun, yucuan cuví nu caña tandihí ca nuu cha ña vaha. Ta yihí ñu cha tyehe caa cuñí xaan ñu xuhun, ta cha cuenda cuan sandihí ñu tuhun cha chinó iñi ñu tuhun Nyoo. Ta yucuan cuví nu suri chi maa ñu sanyehé ñu tindoho.

Lucha cha iyó chi yo cha chino iñi yo chi Nyoo

¹¹Soco yoho cuvún noo rayii cuenda Nyoo. Caca cono chi tandihí cha quiñi caa cuan. Ta cuhun chata

cha cuítì. Vaha cōun nuu Nyoo. Cūñii iñun chihin ra. Cūñun chi ñáyivì. Cōo cha cama iñun chihin tandihì cha cuvì chuun. Ta masu cuvì iñun. ¹²Ñihi sacuvun tyiño nuu Nyoo vatyi tyicuan caa tahán chi tyi chinó iñi yo chi ra. Ta ma saña ndahun ñáyivì chaa cha ma naa ca maa cha chahā Nyoo chi yo. Vatyi ican cuenda cuan nacana Nyoo chuun, quivì catyì cachun tyi chinó iñun nuu cuaha xaan ra cuvì cha ndaa. ¹³Ta chihin nuu Nyoo, ra cha chahā ñáyivì coo tandihì cha iyó, ta chihin nuu ra Cristo Jesús ra cha chahā vaha cuenda nuu ra Poncio Pilato, catyì chuun vityin, ¹⁴na sacuvun tandihì cha catyi chuun tacuhva ma cuhvon cuhva cha cahan ñáyivì chuun nyacua nya quivì quichi Sutu Mañi yo Jesucristo. ¹⁵Na chaa maa quivì, Nyoo cusaquichi ra chi ra Cristo inga chaha. Ican ra cuvì ra cha sacahnu yo, ta noo tuhun ri maa ra cuvì Nyoo ra iyó xaan tunyee iñi chii. Rey cuvì ra cuenda tandihì ca ra cuvì rey. Ta nyacá ñaha ra chi tandihì ca ra cha nyacá ñaha. ¹⁶Noo ri maa ra cuvì ra ra ñahri tuhun chihi iyó chii. Ta iyó ra nu ndichin nu yori maa tuhva. Ta ni noo ñáyivì ta nyehe ca ñu chi ra. Ta ni ña cuvì nyehe ñu chi ra. Chi maa

ra na sacahnu yo. Ta na cunyaca ñaha ra tyicuan ri maa. Ta na cuvì chi tyicuan caa.

¹⁷Ta ñu cha iyó cha tyayii chi ñáyivì ihya, catyì chi ñu vatyi ma cahnu xaan saha ñu chi ñu. Ta ma cuita iñi ñu chi cha tyayii cha iyó chi ñu. Vatyi coto coo quivì ta ndihì cha tyayii cuan. Soco na cuita iñi ñu chi Nyoo nyitó, vatyi maa ra cuvì ra chahá tandihì. Ta cuaha chaha ra chi yo tacuhva cusii cuñi yo. ¹⁸Catyun chi ñu tyayii na sacuvi ñu cha vaha ta ñii iñi ñu cuhva ñu cha iyó chi ñu chihin cha ma uhvi cuñi ñu. ¹⁹Tyicuan ta coo cha tyayii ñu andivì ta cutyinyee chi chi ñu nu cuahan ca chi quivì. Ta tyehe caa cuvì coo ñu ñáyivì cha ma naa ca maa.

**Nu ndihì chahá ra Pablo
tuhun chi ra Timoteo**

²⁰Yoho Timoteo saha cumi vahun tyiño cha chahā Nyoo chuun. Ma tyasohun tuhun cha siin caa, tuhun cha ñima ri tuhun. Ma quichahun tuhun cha catyì ñu vatyi cha chíni tuñi cuvì, vatyi ña ndicha. ²¹Vatyi cha cuenda cuan yihí ñu cha quita caxiin ñu ityi Nyoo. Ta ña chinó vaha ca iñi ñu cha ndicha.

Ta Nyoo na nasoco ra chi ndo.

Ta na cuvì chi tyicuan caa.